

# Igl emprem congress internaziunal da dialectologia a Löwen e Brüssel : ils 21-27 d'uost 1960

Autor(en): **Widmer, P. Ambros**

Objekttyp: **Article**

Zeitschrift: **Annalas da la Societad Retorumantscha**

Band (Jahr): **74 (1961)**

PDF erstellt am: **22.07.2024**

Persistenter Link: <https://doi.org/10.5169/seals-225625>

## Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Ein Dienst der *ETH-Bibliothek*

ETH Zürich, Rämistrasse 101, 8092 Zürich, Schweiz, [www.library.ethz.ch](http://www.library.ethz.ch)

---

## Igl emprem congress internaziunal da dialectologia

*a Löwen e Brüssel, ils 21—27 d'uost 1960*

*da P. Ambros Widmer*

Sever Pop, il renomau linguist all'universitad da Löwen che dumbra ozildi 13 000 students e 600 professers, ha convocau la stad vargada ses numerus collegas d'universitad, dialectologs, redacturs de vocabularis regiunals e professers da lungatg digl entir mund per igl emprem congress da dialectologia. Varga 300 representants de tut las tiaras, cun excepziun dell'Austria e della Russia han dau clom alla invitaziun. Ins sa haver retenentschas motivadas encunter la «congressitis» da nos dis, mo cura ch'ei dat in fritgeivel «tête-à-tête» denter ils scrutaturs, nua ch'ils referats muossan il progress contonschiu e dattan niev anim per la laver scientifica, resta in tal congress buca mo eveniment social combinaus cun in viadi en tiaras jastras, mobein sa esser in muossavia ed ina experienza persunala, gie ina surpresa emperneivla.

La damaun dils 21 d'uost ein ils congressists seradunai el grond auditori dell'universitad per tedlar ils discours d'entschatta fatgs dals magisters da linguistica: Albert Carnoy da Paris, Alf. Sommerfelt da Oslo, Mgr. Anton Grieria da Barcelona, il veteran dils romanists dell'Europa, Natan Lindquist da Upsala, Mgr. Gardette da Lyon, Friedrich Schürr da Friburg en Br. La Svizzera era representada tras Rudolf Hotzenköcherle dall'universitad da Turitg, che ha discuriu dalla historia e la situaziun actuala della dialectologia svizzera. Suenter quella ceremonia d'introducziun han ils congressists priu igl emprem contact persunal in cun l'auter; quei

contact ei sefrancaus e stabilisaus duront ils dis suandonts ed ha dau all'entupada scientifica ina tempra persunala e humana.

Da tons e tons dialectologs vev'ins udiu e legiu; cheu fuv'ei in plascher special de puder conversar cun els. Oravontut han ils representants dellas tiaras nordicas, Norvegia, Suezia, Islandia, mo era quels dalla Jugoslavia ed Ungaria mussau e tschercau il contact persunal. Ins astga era remarcar, che las grondas testas della linguistica, in M. Cohen, in A. Kuhn ed auters han surpriu e legrau ils participonts tras lur mudestadad. -

Il congress ha luvrau en tschun sessiuns parallelas mintgamai dallas 9 tochen las 12 e dallas 3 tochen las 7. Cunquei che la materia era schi vasta, han ils singuls oraturs stuiu serestrensch sin in rapport da 20 minutus e las discussiuns stuevan teoreticamein esser sut tetg en 10 minutus. Mo da tala maniera eis ei stau pusseivel de dar il plaid en ina sessiun da treis uras a sis oraturs Mintga sessiun fuva presidiada da treis presidents e dus secretaris, ed il tema cumpegliava mintgamai ina certa gruppa da dialects, p. ex. ils lungatgs celtics, ils idioms slavs, tut las damondas sur dil catalan etc. Cunquei che la romanistica u la filologia romana formava mo ina part de tut il ciclus dils temas, era quei congress buca ina concurrenza dils congress tradizionals della filologia romana, anzi: Ils romanists encuntravan e sefruntavan cheu inaga lur collegas dils auters roms della linguistica, ils slavists, ils germanists, ils celtologs, ils finnologs, balcanologs. Ei ha semussau che quei «rendez-vous» ei fetg fritgeivels per la romanistica, e che ils problems, co conservar, perscrutar e «vocabularisar» in dialect ein dapertut ualts ils medems. Igl ei stau nunpusseivel d'assister a tut las sessiuns, nundir de digerir tuts ils rapports dalla China tochen Canada. Ils participonts han assistiu e discussionau tenor lur gust ed interess. Recepziuns tier las autoritads dil marcau e dell'universitad, duas seras recreativas ed in tur ad Amsterdam e Namur han procurau per divertiment denter la lavur scientifica. Essend che presapauc in e scadin dils congressists ei sepresentaus cun in rapport da studi, ei il congress propri staus in consorzi da lavur e buca mo in eveniment social. Ils resultats scientifics vegnan publicai en plirs toms, aschia ch'ei dat cheu l'emprema gada ina survista mundiala de tut las retschercas dialectalas. Ils davos dus dis ei il congress dislocaus da Löwen a Brüssel ed ha continuau las lavurs all'universitad statala. Ina gronda prestaziun

d'organisaziun! Zun interessanta ed instructiva ei la viseta alla sala d'exposiziun stada: publicaziuns scientificas, cartas dialectalas, tabellas linguisticas, statisticas dils idioms, tut arrånschau geografamein tenor continent e naziun, devan in impressiunont maletg. - La Svizzera era representada en tuts quater lungatgs naziunals. Presents eran ils redacturs digl «Idioticon» q. v. d. dil Dicziunari dils dialects della Svizzera tudestga, dr. Schüle, redactur dil «Glossaire des patois de la Suisse romande, Ghirlanda, redactur dil «Vocabolario della Svizzera italiana. Il congress ha en differentas caschuns renconuschiu e ludau la toleranza exemplarica per ils lungatgs da minoritad. Ferton che, en certas tiaras dil sid e dil nord, las minoritads linguisticas ston cumbatter per lur existenza encunter il Goliath della lingua ufficiala, respirein e s'exprimin nus en nossa patria en tutta libertad. Lu han ins era ludau la lavur da qualitad che vegn prestada dapi decennis tras ils quater gronds vocabularis naziunals. Ils redacturs jasters ein s'informai exactamein sur dallas metodos applicadas en quels dicziunaris. -

Il Romontsch grischun - ils Romontschs da Friul vevan ina sessiun mo per els, ferton che la Ladinia tirolesa era representada fetg flei-vlamein - ei vegnius presentaus tras in rapport sur dalla situaziun actuala della linguistica retoromontscha. Il rapport ha anflau buna accoglientscha, ed ella discussiun ha dr. Schüle aschunschiu in pèr patratgs essenzials sur da nies romontsch. Ella sala d'exposiziun pendeva la gronda carta colurada della repartiziun dils idioms romontschs el Grischun, ina carta che la Ligia Romontscha veva empristau per quei scop. Ins ha dasperas stuiu dar biaras pintgas informaziuns sur dil romontsch ed ins ha constatau cun plascher il grond interess per la lingua retica. Auters ein seregurdai en conversaziun privata da lur experienzas linguisticas el Grischun, sco p. ex. professor Hatzfeld da Washington, che veva en giuvens onns empriu zatgei romontsch a Mustér, u professor Boleo da Lissabon, che sefigeva capir a Breil cun siu lungatg portughes. In laud unanim han ins spendiu alla gronda lavur scientifica dil «Dicziunari rumantsch-grischun». Representants dell'America dil sid, della Rumenia e della Irlandia miran sin el sco campiun ed exemplel per lur vocabularis dialectals.

Igl emprem congress da dialectologia ha certamein contonschiu sia dubla finamira: far enconuscher ils linguists in a l'auter e mussar

il stan actual dellas retschercas scientificas. Mo forsa ei igl emprem congress de quella sort era il davos. Cun consternaziun ha il mund scientific udiu la mort digl iniziant dil congress, professer Sever Pop. Ina malsogna crudeivla ha baul suenter il congress mess quei um nunstunclenteivel «ord il cumbat». El ei morts il fevrer 1961 ella clinica da Löwen. Ina immensa lavur, entschatta en sia patria Rumenia, ed ina veta da fuigia e persecuziun, mo era da success scientific e stema europeica ein idas alla fin cun Sever Pop, professer da dialectologia all'universitad da Löwen.